

TI-KAROT EK EPOUVANTAY

Mo granmer ti'ena enn karo karot. Toulezour granmer al get zot. Li donn zot disel, li donn zot delo, apre li kares zot feyaz. Zot feyaz ti telman zoli ki tou zwazo ti kontan al fer fet laba. Pizon vini, frrrrrrrr, fioup. Martin: frrrrrrrr, fioup. Konde: frrrrrrrr, fioup.

Granmer ti amerde ek li ti fer amenn enn Epouvantay pou farous bann zwazo. Epouvantay ti mizer: so semiz desir-desire, lor so latet, enn vie sapo lapay ek li ti telman gran ki so kalson ti trwa-kar. Abiye li pa ti bien abiye, me makiye, papao! So lizie ti 2 bouton rekouver, so lalev ti rouz ek *so nene*, so nene ti enn bout kreyon kouler...

Toulezour, Epouvantay ti pe fer so travay. Okenn zwazo pa ti kontan li. Sa ti rann li tris ek li ti santi li tousel. Me lerla kan li panse ki aköz li ki tou karot ti bien kontan, sa ti rekonfort li. Ziska ki enn swar kan zot tou ti pe dormi, Epouvantay tann enn son lor later. Enn lever pe dans-danse ti pe monte.

Epouvantay dir li: Ki to danse sa ler-la kan zot tou pe dormi?

Lever dir li: Oh toi grand Epouvantay, grand de taille, mais dépourvu de racines. Que sais-tu de terres et des vers et de ver de terre?

Epouvantay lev so nene: Eyy Molière, dir mwa an kreol, an Kreol Morisien, dir mwa ki to pe fer?

Lever: Au cœur de cette terre, on trouve des carottes.

Epouvantay: Wi, wi, ena karot.

Lever: Il y en a une qui a peur parce qu'elle est très petite et elle n'a pas d'ami.

Epouvantay: Ah wai?!

Lever: En effet! Bein chaque soir, je vais chez elle pour chanter, pour danser, et pour la rassurer que des bienfaiteurs veillent sur elle.

Epouvantay ki ti enn lam sansib, so leker ti fermal. Li ti anvi may ti-karot for ek dir li "pa bizin to per".

Epouvantay fer so latet travay. Li atann aswar pou ki li re zwenn lever.

Ariv aswar, **Epouvantay** dir: Ey lever, to pou dir Ti-karot enn zafer pou mwa?

Lever reponn li: Ne m'appelle pas ver. Appelez-moi chef, car je suis ingénieur. Ingénieur de terres, ingénieur de vers.

Epouvanatay: pfff... Donn Ti-karot enn bout dan mo kreyon kouler... Dir li, enn zour lavi pou pli zoli...

Lever: Ahem ahem... l'amour, l'amour... L'homme est grand lorsqu'il aime.

Depi sa zour-la, lever vinn mediatel ant Epouvantay ek Ti-karot.

Ti-karot so lemond ti sanze. Li ti nepli gagn traka ki li pena kamarad. Li ti nepli gagn traka ki Granmer pou derasinn li. Li ti nepli gagn traka pou dormi dan nwar.

Sak zour, Epouvanatay dir lever vinn enn tigit pli boner, ek res enn tigit pli tar.

Enn zour-la ti 5hr dimatin. Ti lever pe danse pe monte, Epouvantay pe prese pou zwenn li, zot pa ti remarke ki lot kote, enn Konde ti pe yam li.

Lever touzour pe sante: Rêve ta vie en couleurs, c'est le secret du bonh....

Frrrrrrrrrrr.... Op! Konde inn gagn so ti-dezene.

Li pas ar Epouvanatay, li anvole, li disparet.

Epouvanatay so nene tonbe.

Sa swar-la ti lanwit pli difisil pou Epouvanatay.

Karot inn res atann ziska gramatin ki Lever pou vini.

Li ti pe anvî konpran ki'nn arive:

Kifer Epouvanatay inn ale, kifer Lever zame pou vini.

Li nepli mem kapav plore kan li realize ki aster li'nn perdi tou....

Sa swar-la, enn mari loraz inn kriye, enn gro lapli inn koumans tonbe. Siklonn Karol ti pe menase.

Lapli inn tonbe, tonbe, tonbe ziska bout kreyon kouler ki ti lor later inn fonn... Tou kouler inn dervers lor Ti-karot.

Sa ler-la, alor ki Epouvanatay lao ti pe debat pou so lavi, anba Ti-karot ti retrouv li dan enn rev mazik...

2 zour inn pase. Siklonn inn ale. Granmer inn vini pou tir tou karot.

Li ras zot enn deryer lot. Li met dan so panie. Kan ariv tour Ti-karot, li get li ek li zet li dan kwin.

Epouvanatay ki ti tonbe akote inn trouv li. Li'nn blok li for dan so lamin.

Kan Granmer inn fini met lord dan karo, li al kot Epouvanatay. Li ed li pou re deboute, donn li enn nouvo semiz aflu, enn sort ble-ver ek enn kasket zonn. Kouma granmer vir ledò, Epouvanatay pran Ti-karot, koste li ar so figir, ek li plas li kot so nene... Epouvanatay get li de pre ek li dir li...

“Je t’aime sans passé, je t’aime sans avenir, mais je t’aime comme je respire...”

Fin